

# Gui'ch guxhaal San Pabl loj Tito

## *Rhxiaal Pab xtiidx Dios*

<sup>1</sup> Naj Pab cayünan Dios sirv, naj najn xiapóstol Jesucrist par günan yudar bén ma naj ree par Dios xhienaaag chililadx reeman laaman din gagbee tée reeman diidxli xhienaaag guiban reeman delant loj Dios, <sup>2</sup> din yu'guijc ree guial zian yaya'p ree guialnaban tiblayaa delant loj Dios. Diizd chi gad guidxliuj gacchaaw, rëbaman guial yazaladxaman guialnaban guin, abi' dunuj ree rayagbee ree zagedxe guial ad rniet Dios diidx rusquiee. <sup>3</sup> Abi' chi bidxin dxej ni gule Dios guial gogbee ree bejn xtiidxaman laaman balüü xtiidx, abi' naj bayal catiechan xtiidxza'caman laan naj ni guxhaalaman naj günan, bén ni rüjn dux tol ree perdon. <sup>4</sup> Cucan gui'ch guie par lüj, Tito, guial najl zi'c da xi'nan guial tiblojzi raliduladx Jesucrist. Dux Dad ree Dios con Jesucrist bén güt por dux tol ree, yaya reeman lüj, güünle' reeman lüj yabe'cdxe tée reeman luxdool.

## *Dxiin ni been Tito guiedx Creta*

<sup>5</sup> Naj basa'n lüj niz Creta din güünl ni ryaadx günan ni. Abi' tijbgaj luguiedx gucaabeel bén ni nabee ree loj ree xbejn Cristo zi'c ma rnin. <sup>6</sup> Chi gucaabeel laa reeman rayal gucaabeel bén ni nabee ree zi'c rayal chitëe chu guinieeguijdx laaman, bén ni yu' tijbzzi lacheel, rliladx tée ree xi'nman Jesucrist, bén ni nünbee ree bejn guial ad nabant

ree xi'nman zi'ctzi rën reex ad najt tëët reex xin rusagloj. <sup>7</sup> Din bén rajp guialrniabee loj ree xbejn Cristo, lojman riga' gra ni naj por Dios, zeel rüjn naguiejn guibanman zi'c rayal. Ad rayalt güünman xgab guial tibzzi ni guiëbaman güün sirv, ad rayalt gacaman bénralenya', ad rayalt gacaman bengu', ni'qui ben ruladx wadijl, ad zaguuil tëëtaman mod xhienaag tia'man xmilia ree bejn. <sup>8</sup> Rayal gacaman bén ni gudëë lidx yaya'n ree bejn chi rüjanan naguiejn, bén ruladx güün ganax ni zagdxe, gac tée nabee laagajcaman. Rayal gacaman benza'c, guibanman zi'c rayal delant loj Dios në delant loj ree bejn, ad rayalt guibanman zi'ctzi rënman. <sup>9</sup> Rayal chinalaman diidxli ni ma basiidaman, din chile' gusiidaman bejn ree diidxza'c guin ree din guzuxnejz téeeman bén ni rnieeguijdx ree xtiidxli Dios.

<sup>10</sup> Din däd zien ree bén ad ruzoobt diidx yu'. Ganax diidx rusquiee rniee reeman abi' rusquiee reeman bejn ree, abi' loj ree bén Israel ni rulüü ley loj reeman no'ch mazri lasa' ree ben guin. <sup>11</sup> Lasa' ree bén guin ad rayaltri yatiëëb ree gulüü reeman bejn ree, din däd zien ree yu ma beendxa reeman gra tibz famil guial rulüü reeman laa reeman ni ad rayalt naabzi par güün reeman gan milia.

<sup>12</sup> Tibz gajc bén ladx reeman bén rëb reeman naj bén badëë xtiidx Dios loj ree bejn, laaman rëb guial ree bén Creta ganax diidx rusquiee rniee reeman, däd nadoxh reeman, däd bén nala naj reeman abi' achetczi rën reeman güün reeman. <sup>13</sup> Abi' waliman, zeel gudilë reeman con diidxdoxh din chile' chinal reeman xtiidx Cristo zi'c rayal, <sup>14</sup> ad guidxga'ri reeman ni rbëëgujc ree bén

Israel, ad güün teë reeman ni rniabee ree bén ni ma guro'nladx ree ni naj diidxli.

<sup>15</sup> Bén naya ree xquiargueijn, achet xgab mal rüjn reeman. Per ree bén rüjn ganax xgabdxuudx, bén ad rliladxt, achetczi xgab zagdxe rüjn reeman guial ad nayat xquiargueijn reeman, ganax ree xgab mal yu' guijc reeman. <sup>16</sup> Laa reeman rëb guial nünbee reeman Dios, per rëbzi reeman din ad rüjnt reeman ni rën Dios. Dád bendxuudx naj reeman rusagloj tée reeman, ni'qui tijb ni rüjn sirv ad rajct rüjn reeman.

## 2

### *Ni rayal gulüü Tito*

<sup>1</sup> Per lüj Tito, balüü ree bejn gra zi'c tal naj xtiidxza'c Dios. <sup>2</sup> Balüü ree bengol din guiban reeman zagdxe, gustëdguien reeman din gap bejn laa reeman respejt, guidib luxdoor reeman chililadx reeman, guiën reeman bejn ree, taan tée reeman xhietëëz ni sac reeman. <sup>3</sup> Ziangularc ree bengunaa bengol rayal guiban reeman zi'c rayal guiban ree xbejn Cristo. Ad rayalt gü reeman xtiidx bejn, ad gac reeman bengu'. Rayal gulüü reeman bejn ree xhienaa naj ni zagdxe, <sup>4</sup> rayal gulüü reeman bengunaa guiag ree din guiën lacheel reeman con xi'n reeman, <sup>5</sup> din guiban tée reeman naya delant loj Dios, nadëdguien, guinia lidx reeman, gac reeman benza'c guzoob tée reeman xtiidx lacheel reeman chitëë chu guinieeguidx xtiidx Dios.

<sup>6</sup> Ziangularc lüj Tito, badëë consejw loj ree xinguaaw guiag din guiban reex nadëdguien. <sup>7</sup> Been naguijejn din güünl gra xnejz din guguaa reex

xhienaaag güün reex ni naj zagdxe. Chi rulüül laa reex, balüü reex zagdxe zi'c rayal,<sup>8</sup> con ganax ree diidx zagdxe chitéë xhie gudxiib ree bejn guijquil, din yaya'nxtu ree bén ni rdxe'ch dunuj ree guial achet yadxejl gudxiib reeman duguijc ree.

<sup>9</sup> Badëë tëë consejw loj ree bén naj ree mojs din guzoob gra xtiidx xpatron reeman, gac reeman benza'c ad yadxi'ro' reeman. <sup>10</sup> Ad cwan reeman xhie xieen xpatron reeman, gac reeman bén confians din guguiaa gra ree bejn xhienaaag naban reeman guial niza'cdxoon naj xtiidx dux Dad ree Dios bén rüjn dux tol ree perdon.

<sup>11</sup> Abi' Dios ma balüüman plact rënman dunuj ree, abi' guial rënman dunuj ree zile' gac gra ree bejn perdon. <sup>12</sup> Guial rënman dunuj ree rayagbee ree guial rayal yasa'n ree ni mal con ree ni ad rünjt sirv ni rayën ree yaguieen ree loj guidxliuj guie, din yabajn ree nadëdguien, zi'c rayal, zi'c rën Dios yabajn ree loj guidxliuj guie <sup>13</sup> la'tgaj caylëjz ree dxej za'cdxoon ni gac cumplid xtiidxza'caman zi'c ma naman duloj ree guial gui't dux Dios ree Dad Jesucrist con xguialrniabeeman, bén been perdon dux tol ree. <sup>14</sup> Laaman güt por dunuj ree din yabëëman dunuj ree loj gra dol abi' basiaman dunuj ree din yayajc ree xbejnzaman abi' yaguieen ree naguiejn yaguieen ree ganax ni zagdxe.

<sup>15</sup> Gra ni ma rmin lojl balüün laa reeman sin guialrdxeb badëëd reeman consejw, bazuxnejz reeman con guialrniabee ni ca'l. Ad tiëbil gusagloj reeman lüj.

**3***Ni rayal güün ree bén rliladx Jesucrist*

<sup>1</sup> Basaaladx reeman din güün reeman ni rëb ree bén rniabee laa reeman në ni rëb ree guxtis, gac reeman bén nacaagdajg susin tëë reeman par güün reeman ni naj zagdxe. <sup>2</sup> Ad guinieeguijdx reeman bejn ree, ad quil reeman wadijl, gac reeman benza'c në bénchaawladx con chutëëz bénan.

<sup>3</sup> Gocli nëgajc dunujn baguieenan zi'ctzi bayënan, ad bazoobtan diidx, badxu'n loj nejz mal, baguieenan ni bayëntzan në zi'ctzi naj dux xgaban. Baguieenan ganax ni ad najt zagdxe, bayajcan bén nadëdloj, bidxe'ch ree bejn dunujn abi' badxe'ch gajcan laa reeman. <sup>4</sup> Per chi bidxin dxej dux Dad ree Dios bén baguijx por dux tol ree, balüüman loj ree bejn guial najman benza'c rën tëëman bejn. <sup>5</sup> Laaman been dux tol ree perdon, per ad guial baguieent ree xhie ni rüjn sirv, guial bayaman dunuj ree. Laaman basia dunuj ree yan ma nayajc ree naya delant lojman, abi' por xSprijtaman ma raya'p ree guialnaban cüb. <sup>6</sup> Por Dad Jesucrist bén baguijx por dux tol ree, Dios bazaladx dunuj ree zro' da't xSprijtaman. <sup>7</sup> Dxel zi'cgajc laaman ma nulabaman dunuj ree sin dol guial najman benza'c, yayal ree guialnaban tiblayaa ni ralëjz ree.

<sup>8</sup> Laan naj diidxli. Zeel rënan gusnuu gugojnl diidx guie ree bén ni rliladx ree Dios din güün reeman naguiejn güün reeman ni naj zagdxe. Abi' nine ree naj ni zojbloj në ni güün sirv par gra ree bejn. <sup>9</sup> Per ad guidxga'l diidx ni ad rüjnt ree sirv ni rniecee ree bejn, ad guidxga'l xtiidx ree bén ni ru

ree xgab mazri chunin naj diidxli xdiaa gulal ree bejn. Ad guidxga' tëël bén ni rdildiidx ree por xley Moisejs, din ad najtan ni zojbloj achet tëët lasajc ni rniece reeman, achetczi sirv rüjn ree ni guin.

<sup>10</sup> Bal por tijb lëjt rzuloj rlia' lasa' ree xbejn Cristo, guneenéman tib volt o tio'p volt, abi' bal id ruzoobaman xtiidxil mejorli babëéman lojdi. <sup>11</sup> Din lüj ragbee guial lasa' ree bén guie ma guro'nladx reeman ni naj diidxli abi' laagajc reeman cunijt laa reeman por xtol reeman.

### *Ni rayal güün Tito*

<sup>12</sup> Chi gaxhalan Artemas o Tíquico lod zojbil, been da't naguiejn tagnaj naj luguiedx Nicópolis, din ni ma benan xgab gadëëdan tiamp nayaag.

<sup>13</sup> Been tëë yudar Apolos në licenciad Zena zi'ctzi gaquil. Badëë gra ni ryaadx reeman din chinal xnejz reeman chitëë xhie guiyadx reeman. <sup>14</sup> Në ree dux compniar ree rayal gusiid güün ni naj ni zagdxe, güün reeman yudar chi rüjn naguiejn güün reeman yudar chitëë guiban xlia'zi reeman.

### *Diidx bigra ca ree loj gui'ch guie*

<sup>15</sup> Gra ree bén za' con naj rugajpdioz reeman lüj. Bagajpdioz sii gra ree bén rën dunujn por guialrliladx ni raya'pan. Dux Dad ree Dios güünle' gradi. Amén.

## Xtiidx Dios

### New Testament in Zapotec, Santo Domingo Albarradas (MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

### Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
fb4ebcb8-e1f4-5bfc-b08c-f590e137d86d